

Mr. Luciano Milliard:

Un figura intelectual pero tambe spiritual y un persona di fe!

HOLA ARUBA a haya e gran honor di entrevista señor mr. Celcio Luciano Milliard, kende na un edad masha hoben mes no solamente ta docente di Derecho Constitucional na Universidad di Aruba, pero tambe Decano Suplente di Facultad di Derecho.

Luciano Milliard a nace na San Nicolas na año 1971 y su mayornan ta señor John Lorenzo Grovell y señora Olivia Milliard.

E prome school cu el a bishita ta J. N Andrews School (School Adventista) te su Derde Klas pasobra e school aki a cera y e ora ey el a cuminsa bay Princes y Reina School, cu tabata situa den edificio cu despues a bira Brown School.

Despues di school basico el a bay Colegio Arubano te klas WWO-3, debi cu e decision difcil a cay cu e famia mester a bay biba na Hulanda.

Nan a bay biba den Ciudad di Groningen, y den e ciudad aki el a bishita H. N Werkman College unda el a haci "Atheneum" (VWO). Ora el a caba e estudio aki, el a tuma un break di un año y den e año aki el a bira docente di Ingles na Universidad di Haiti, na Port of Prins.

SU DECISION PA BIRA HURISTA:


Despues di su estadia na Haiti Luciano a regresa Hulanda unda a cuminsa su estudio di Derecho na Universidad di Maastricht, y tambe el a studia pa mey año, Derecho Internacional na London. Pero di con el a scoge Derecho como profesion?

"Semper mi soño tabata pa bira docter. Mi kier a bira of Pediatra of un Veterinario pero ora mi tabata den e 5de Atheneum nos a haya e vak 'Economia y Derecho' y e ora ey mi a dicidi cu Derecho mi ta bay studia.

Mi a studia cinco año y mey na Maastricht y mi a haci un par di cursonan extra y mey año cu mi a studia na London tambe. Despues cu mi a gradua na Hulanda, mi a worde ofreci un trabao como docente na Universidad di Maastricht pero mi no a tuma e trabao pasobra mi kier a bin Aruba bek.

Mi a bin bek pa un tempo pero mi a wak un aviso den corant cu na Universidad di Groningen ta buscando dos Hurista Arubiano pa skirbi un tesis. Mi a solicita y mi a worde acepta pa bay Groningen pa cuatro año.

Na Universidad di Groningen mi a traha riba mi tesis y mi a duna Derecho Constitucional tambe. Despues mi a regresa na Aruba y mi a bira docente na Universidad di Aruba".



COMO DOCENTE NA U.A.:

E año aki ta mr. Milliard su di tres año como Docente na Universidad di Aruba, unda e ta hopi aprecia pa su coleganan y sigur pa su studiantenan.

"Tur cos cu bo ta haci den bida bo tin cu hacie cu pasion y mi ta stima comparti mi conocimiento cu otroonan. Mi gusta intercambia idea cu otroonan, y aki na Aruba traha riba e veld di Derecho Constitucional ta hopi interesante, pasobra tin hopi cos cu ta pasa den comunidad cu tin di haber cu e tereno aki. Por ehemplo nos relacion cu Hulanda, e posicion di Parlamento, e posicion di La Reina, etc., cu ta hopi interesante pa trece den discussion".

Considerando mr. Milliard como un excelente docente, cu ta comentarionan cu studiantenan mes ta haci, HOLA ARUBA a puntre kico ta ser un bon docente:

"Ta un bon docente kiermen tin e pasion pa e materia y tin un bon conocimiento general, sa kico ta pasando na mundo y tin e habilidad pa transmiti esaki.

Na Hulanda, por ehemplo, e studiantenan ta haya e materia aki laf, y sabiendo esey como docente mi tin cu busca e manera pa trece interesante pa mi studiantenan. Pa logra esaki mi tin cu pone un par di joke den dje pa studiantenan hari un tiki, pero na mes momento compronde loke e docente ta papia.

Mi no por bisa cu e studiantenan ta haal e vak mas facil cu otro materianan pero si mi ta wak e interes di casi tur estudiante di tey. Aunke nan no haal'e nan ta bin les. E materia ta yuda nan compronde hopi cos cu ta pasando den politica, y hopi biaha studiantenan ta bisa mi cu nan kier sigui cu e les maske e ora di caba a yega.

Algo cu mi ta ripara cu studentenan tanto na Hulanda como na Aruba ta aprecia ta ora mi ta trece e parti di filosofia politico. E ta duna nan un bista riba un comunidad, riba kico poder ta, con bo por contraresta poder, etc. Ami personalmente tambe ta stima mas e parti aki”.

COMO DECANO SUPLENTE:

Ora cu e Decano di Facultad di Derecho no tey, mr. Milliard ta tuma su tareanan. Pero kico e tarea di un Decano ta encera?

“Un di e aspectonan principal ta prepara e reunionnan di e Consejo di e Facultad. E Consejo ta e Organo mas halto di e facultad unda decisionnan cu tin di haber cu diferente procedurenan di examen, decisionnan riba nos diferente materianan pa futuro, decisionnan riba estructura di estudio, ta worde tuma. Como Decano bo tin cu ehecuta e decisionnan di e Consejo.

Alavez si e estudiante tin un problema, como Decano bo ta e prome persona cu nan ta busca. Si nan tin problema cu nan no por sigui cu nan estudio, of cu nan no por caba e estudio den e periodo reglamentario, nan ta busca contacto cu e Decano pa haya consejo riba kico pa haci.

Tambe e Decano tin tareanan representativo den comunidad manera duna informacion na Colegio Arubano, y ora cu tin open-dag na Universidad mes, pues un Decano ta e cara di e Facultad”.

MIEMBRO DI FESCA:

Mr. Milliard tin tres aña como Vicepresidente di FESCA (Comision Cientifico di Partido AVP). El a splica nos den corto kico e organizacion aki ta haci.

“Nos ta studia diferente materia, por ehemplo riba economia, sistema Parlamentario, nos posicion pa cu Europa, entre otro, y tambe nos ta traha rapport riba e materianan aki. Tambe nos ta organiza simposio of tayer di trabao riba diferente tema. Nos a organiza e tayer di trabao ‘Inmigracion na Aruba’ y nos a yega di organiza tambe seminario tocante Europa y riba e funcionamiento di Parlamento.

Riba tereno di Parlamento nos kier wak pa Parlamento funciona mehor. Na nos opinion e miembronan di Parlamento mester haya mas asistencia pa nan por haci nan trabao, y pesey nos ta boga pa nan haya e ‘Fraktie Medewerkers’ pa asisti e Parlamentarionan.

Nos ta prefera pa nan ta hendenan bon studia, pasobra nan mester analiza e conceptionan di ley y traha un consejo pa e Parlamentarionan. Por ehemplo, egresadonan di Universidad por asumi e tipo di trabao aki”.

UN PERSONA DI FE:

Tin biaha ta reina e impresion cu hende intelectual no ta spiritual y hasta cu nan no ta kere den Dios. Mr. Milliard ta muestra tur contrario. E ta un persona di fe y e ta un miembro activo di Iglesia Adventista.

“Mi ta considera mi mes un persona di fe. Religion pa mi tin di haber cu compasion. Den bida nos tur ta pasa den momentonan amarga, y den un situacion asina nos tin mester di un hende cu ta bisa nos ‘no desanima, bo lo vence!’. Como miembro activo di Misa Adventista actualmente mi no tin un posicion fiho den Iglesia, pero mi ta yuda cu e hobennan, y mi ta yuda organiza diferente evento sea pa recauda fondo, of ora tin Congreso asisti cu e parti di relacion publico, etc”.

VOOGD DI DOS MUCHA:

Mr. Milliard ta un persona soltero ainda, pero for di dos aña pasa el a asumi e reto di ta voogd di dos mucha, un mucha homber di 14 aña y un mucha muher di 12.

“Mi ta carga tur responsabilidad di mayor pa e muchanan aki y door di esaki mi bida a cambia drasticamente. Mi tin aworaki ouderavond pa bay, padvinderij, y mi a bira un persona cu mas pasenshi y mi a siña cu un mucha no por lanta su mes. Un mucha mester di adultonan pa guie den su desaroyo. E ta tuma su tempo, energia, y hopi dedicacion, pasobra bo kier pa e muchanan un bon porvenir y futuro.

Mi tin cu bisa cu afortunadamente mi ta conta cu e apoyo di mi mama, mi rumannan y demas famia cu ta comparti e reto grandi aki cu mi”.

UN GOLPI DURO Y MOMENTO DIFICIL:

Mr. Milliard ta bin di un famia di siete ruman. Dos aña nan a pasa den un golpi duro y momento dificil ora un di su rumannan homber cu tabata polis a fayece repentinamente.

“Mi ruman tabata manera un pilar den nos famia y como famia nos a siña conforma cu nos perdida, y nos ta haci nos best awor pa e otro rumannan dedica mas tempo na otro.

Como miembro di un famia, mi por conta cu nos famia tin su raiznan na Isla Ariba. Nos ta un famia humilde, trahador, religioso y di parti di mi mama casi tur ta negociante. Nos gusta ta nos mesun doño y educacion ta hunga un rol masha importante den nos famia”.

SU FILOSOFIA DI BIDA:

Mr. Milliard tin su propio filosofia di bida cual e ta comparti cu HOLA ARUBA:

“Cu sudor di bo frenta bo lo gana bo pan di cada dia, esun cu traha duro ta haya un recompensa grandi. Mi ta kere cu den bida si por logra algo, pero bo tin cu traha masha duro pe. Tin hende cu tin un vision cu nan kier bira den futuro, pero nan no tin e disciplina pa traha pa yega nan meta. Si bo kier cosecha na September, bo tin cu cuminsa sembra na Maart, bo no por cuminsa sembra na September pa cosecha e mesun luna”.

LESA TA SU OTRO PASION:

Apesar cu mr. Milliard ta un persona hopi ocupa, e ta probecha su momentonan liber pa haci algo productivo.

“Lesa, lesa, lesa! Mi gusta lesa buki y revistanan. Mi gusta lesa bukinan informativo tocante politica, sociologia y religion. Mi buki faborito yama ‘Davida’s Harp’ di e escritor Chaim Potok, ken ta un autor Mericano-Hudio y su tema principal ta un conflicto interno unda den e buki aki Davida’s tin un dilema riba ki filosofia di bida pa scoge, sea bira Cristian, Hudio of Comunista”.

NOS HOBENNAN, SU PREOCUPACION:

Mr. Milliard no kier a keda sin expresa su preocupacion di mas grandi: nos hubentud! “Mi tin un grito di curazon pa nos hobennan pasobra mi ta mira cu hopi hoben no ta caba school, nan ta scoge pa un bida di droga of alcohol, y hopi tin falta di un vision pa futuro.

Mi ta haya cu den esaki nos tur conhuntamente mester bay yuda e hobennan pa nan por scoge pa un futuro y un bida productivo pa nan y sigur pa nan pais”.

Mr. Milliard tambe ta comparti e refran: “Ta tuma un comunidad pa lanta un mucha!”.